

Jesús - Mazatec, Chiquihuitlán

1.1

Juan ne, vitenda rë xuta ngajan ngu xín tsëhë nandya

1.1 Cuitjin cavetsihin cja tsëhë Jesucristu, me xi Quihndi rë Nina Jain.

1.14-15

Jesús ne, vetsihin me cojo xa rë me

1.14 Hacuaha camá nga ngu xcusun xi xuta xi matitjun ne, caveya me cha Juan ndavaya. Cavatju vëhë ne, sehe cavuya cafe nga Jesús distritu Galilea, cachja me cojo xuta cja rë Nina.

1.15 Cuitjin cachja me:

—Camatiña nixtin xi Nina ne, cuitexa me ngasunhdë. Vëhë xi meje rë xi nindeyun cjuatacun nuju hacuaha catamacjain nuju cja xi tichjá cojo nuju.

1.21-27

Ngu cha xi jiya rë ngu xitsehen

1.21 Hya xi camá ne, cafehe me cojo catsiñuju cha xi cuacun vëhë nandya Capernaum. Hane hya xi cavechu nixtin xi chjahájenda rë ne, quiji me yungun, cavicya me xuta.

1.22 Hane xuta jan ne, quijircun rë me hacutjin vicuya Jesús ta, tsëhë xi tivicya me sacuaaha ngu xi matitjun jain, hacuiin sacuatjin maestru xi vicuya ley rë xuta tsëhë nangui Israel.

1.23 Hacuaha ha tu ñahñu canduva ngu cha xi jiya xitsehen cahntsua xahasen rë cha ngajan cahntsua yungun jan.

1.24 Hane cuitjin cajindaya cha:

—Ngayun ne, ¿mé cuenda nuju tsijin? ¿Há nduvun nicjun niji? Ngayun ne, Jesús tsëhë nandya Nasaret ngayun. Hacuaha hvë xi ngayun xi tsajin jyë nuju ngayun xi catsingatju nuju Nina.

1.25 Hane Jesús ne, cachja cjan me cojo xitsehen xi jiya xahasen rë cha jan. Cuitjin cachja me:

—Jyuu nechin. Hacuaha tetjixin tsëhë cha vi.

1.26 Xi tu cahmexcuen cha xi casahmi xitsehen ne, hisca cajindaya, hane cavetjuxin tsëhë cha.

1.27 Yëjë ni xuta jan ne, jemu quijircun rë me, hisca cavisiajmi me cojo xicjin me cuitjin:

—¿Mé nga xcusun vihi ni? Ngu cja xatsë xi vicuya me vihi, ta hisca xitsehen, hacuaha hndë tsëhë me.

1.32-34

Jesús ne, sahmi me xi mandaja xutacjín xi hmu rë

1.32 Hane xi cavetje tsuhi ne, jemu cjín xuta quijicojo me xuta hmu rë hiscan tacun Jesús, hacuaha cojo me xi hinchá xitsehen xahasen rë,

1.33 camatangun me cojo xuta nandya ngajan tingotjo ndihya.

1.34 Hane jemu cjín xuta hmu rë camandaja me xi casahmi Jesús, xuta xi má rë me tu mé ni chíhin xi má rë xuta. Hacuaha jemu cjín xitsehen cavaxëxin me tsëhë xahasen rë xuta. Hane casuaain me cahndë xi cachja xitsehen ta tsëhë xi ha vëë rë me. Hane ngutjen cuichja ta me vëhë xi catsingatju Nina me.

2.1-12

Jesús ne, sahmi me xi mandaja ngu cha xi cahme yojo rë

2.1 Hane cahntsua xi ngujo nixtin ne, cavuya quiji nga Jesús cojo cha ladu rë me ngajan nandya Capernaum.

2.2 Hane xi casacu cja xi tacun ndihya me ne, jercu camatangun xuta, hisca tingotjo ndihya quitsë me.

Hane sehe cachja Jesús cjuarë Nina.

2.3 Ngajan xi canduva ñuju cha hiscan tacun Jesús, yahahnga cha ngu cha xi cahme yojo rë.

2.4 Hane xi maji ficojo cha cha hisca hiscan tacun Jesús, tsëhë xi jemu quitsë xuta ne, cavuxaha cha rcu ndihya quixi rë hiscan tacun me. Sehe ngajan catsinguissehen cha cha hmu rë jan cojo ni nachan xi quisun cha.

2.5 Hya xi cavëë Jesús hacutjin xi macjain rë cha me ne, sehe cachja me cojo cha hmu rë jan ta:

—Jyë riji tsan ne, ha camanchataha. —Cuatjin cachja me.

2.6 Hora vëhë ne, hacuaha tivisiñuju ngujo cha maestru tsëhë ley, hacuaha taha titsingatahacacun cha cuitjin:

2.7 “¿Mé má cuitjin chja cha xi cuijyih vi?, ta Nina tsixcuehyu cha. Tsajin yo xi cuma tsinchataha jyë rë ngu xuta ta suva ni Nina má sahmi me.”

2.8 Jesús ne, ha hisca vëë me cojo cjuatacun rë me xi cuatjin tsingatahacacun cha xi cuacún vë, hane sehe cavinenguisse me cuitjin:

—¿Mé má cuatjin ningatuhuntacun cjuatacun vëhë?

2.9 ¿Jarë xi hitsë sa tsavi xi cuichjá cojo cha hmu rë vi? ¿Há xi: “Jyë riji ne, ha camanchataha?” O há tsajin ne, ¿há xi: “Tisatjinhngue ne, chjaye nijña riji, hane tjihin?”

2.10 Hindë cojo sa xi cumachaya nuju xi Nina cavitexa me ngahan xi tsinchátaha jyë rë xuta nguehe ngasunhdë ne, nguehe chutsujun hacutjin cuichjá cojo cha hmu rë vi.

Sehe cachja me cojo cha hmu rë cuitjin:

2.11 —Tisatjinhngue tsan. Chjaye nijña riji ne, tjihin ndya riji. —Cuatjin cachja me.

2.12 Ngajan xi cha hmu rë jan ne, ngutjen ni cavisatjenhnga cha, cafaya cha nijña rë cha, sehe cafe cha xcun ni ngayëjë xuta. Vëhë xi ngayëjë ni xuta jan ne, jemu quijircun rë me. Hacuaha cachja me ta:

—Jemu cjuarcun jain Nina. Vëhë xi cuatjin camá casahmi me. Cjëë camahani chaan xcusun sacuaha vëhë. —Cuatjin cachja xuta.

4.35-41

Jesús ne, tsisejyu me tjo cojo tsindyu rë laguna

4.35 Xi quiji hora tsëhë nixtin vëhë ne, Jesús ne, cachja me cojo cha ladu rë me cuitjin:

—Cuanguen ngunda vëhë. —Cuitjin cachja me.

4.36 Ngajan xi caviyuju ni me xutacjín jan ne, sehe cha ladu rë me ne, quiji cha cojo me tu cuanitjin ni. Hacuaha cojo sa barcu xi yahnga jan ne, quiji tangun cojo rë me.

4.37 Hora xi cjui barcu ne, canduva ngu tjo xi jercu tu hñu camahani. Hane tsindyu rë laguna jan ne, vixuya cahntsua barcu, hisca meje tsë rë barcu cojo nandá.

4.38 Hane Jesús ne, hisca cahnhun barcu jan jiñafë me, tijiña me xcun tsjian sanercu me. Hya xi camá ne, catsingasca cha me, sehe cachja cha cojo me cuitjin:

—Maestro. Xati nihñutacun catasca nuju. ¿Há tsajin mé cuenda nuju ta, meje xtyusehen barcu cojo naja?

4.39 Hane cavasca rë me ne, cachja me cojo tjo cojo laguna cuitjin:

—Jyuu nechun.

Xi tu cachja me cuatjin ne, casejyu yëjë ni.

4.40 Ngajan xi cachja me cojo rë cha cuitjin:

—¿Mé má cuatjin jemu rcun? ¿Hacujiyih ni xi hisca cjëë cumacjain ndaja nuju ngahan?

4.41 Hya xi camá ne, jercu catsacjun camahani cha ladu rë me jan. Hane sehe ngajñi rë cha jan ne, cavisajmi cha cuitjin:

—¿Yo me xi cuijyih vi? ta, hisca tjo hisca laguna hndë tsëhë me.

5.22-24

5.22 Hacuaha cafehe ngu xutaxa rë yungun rë ngu nandya. Cha vëhë ne, Jairo hmí rë cha. Hya xi cavëë cha Jesús ne, quiji cavixcuhnchi cha xcun me.

5.23 Sehe jercu cafehya cha favor cojo me. Cuatjin cachja cha:

—Quihndi naha ne, ha tu hora sa xi cueya na. Cuanguen ne, cuisanu ntsun na ne, cojo sa xi cumandaja na, hane cuejña sa na cjuahñu.

5.24 Xi tu cahndë Jesús cjua rë cha ne, sehe quiji me cojo cha. Hacuaha jemu cjín camahani xuta quiji me hacutjin quiji Jesús. Quiji hnhun hnhun me cojo me.

5.35-42

5.35 Jinguyëjë rë xi Jesús tichja cuaha me ne, canduva ngujo me tsëhë ndava xutaxa rë yungun jan.

Hane cuitjin cachja me:

—Ha cahme quihndi nuju. Tahannnyaan sa rë maestru.

5.36 Peru Jesús ne, handasa cahndë me cjua xi cachja me xi cafehe jan ne, sehe cachja me cojo xutaxa rë yungun jan ta:

—Xi camacjiintacun. Ningatuhuntacun ni xi cumandaja na. —Cuatjin cachja Jesús.

5.37 Sehe casuaain me cahndë xi cjue yëjë xuta jan. Suva ni cha Pedru, cha Jacobo cojo cha Juan hntse cha Jacobo, cha vëhë quiji cha cojo me.

5.38 Xi cafehe me ndava xutaxa rë yungun jan ne, ngajan siu xutacjín xi jihnda me jindaya me ngatsë rë cjuandusin.

5.39 Hane xi cavisehen Jesús ndihya ne, sehe cachja me cojo xuta jan cuitjin:

—¿Mé má cuatjin va má ngayun chjihndun? Na lihndi vë ne, hacuiin cahme na ta jiñafë na. —Cuatjin cachja me.

5.40 Sehe ngajan xi xuta xi siu jan ne, tu vejnujëë me tsëhë cjua xi cachja Jesús. Sehe ngajan xi Jesús ne, catsitëë me xuta xi siu jan candatsen. Hane suva ni nahmi rë nima quihndi cojo naa rë cojo cha xi ticojo me cavisehen me cojo hiscan jiña.

5.41 Sehe cafaha me tsja nima quihndi jan ne, sehe cachja me cojo cuitjin:

—Talita cumi —cjua xi meje cuichja: Tichjá cojo ri, tsan, tisetjinhngue.

5.42 Xi caffè cachja Jesús cuatjin ne, cavuya cjuahñu rë na lihndi jan hacuaha ngutjen ni cavisatjenhnga na catsujiyihiya na. Na lihndi jan ne, tejó nu tjin rë na. Hane me xi siu jan ne, jercu quijircun camahani rë me.

7.18-23

7.18 Ngajan xi cachja me cuitjin:

—¿Há hisca ngayun cajni rcun cjua xi cachjá ni? Nguehe cuichjá cojo nuju mé vijne cjua vëhë. Cuma xinëë yëjë xcusun comida ta tsajin ngu xcusun xi jinë xuta xi cuma tsitsehen rë me

7.19 ta xi sinë me ne, hacuiin cahntsua xahasen rë me cjui ta cahntsua me. Fi ne vetjutaha ndatsen.

7.20 Hacuaha cachja sa Jesús cuitjin:

—Cjuatacun xi nduva tsëhë xahasen rë xuta ne, vëhë tsitsehen rë me ta,

7.21 tsëhë xi xi nduva tsëhë xahasen rë me ne, cjuatacun tsehen, sacuaha yachjin xi viteña yojo rë, sacuaha jyë tsëhë xi sahmi me chjuunnahñu rë me jingu sa chjuun, cojo cjuachëjë, cojo xi tsiquehen xicjin,

7.22 cojo xi jercu meje rë me cjuanchina, cojo xi sahmi me cjuatsehen, sahmi me cjuandacha, choho sahmi me, tjin rë me cjuaxin, sahmi me cjuachjataha, tjin rë me cjuaxihin, sahmi me cjuangarca.

7.23 Yëjë cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me.

9.2-8

Cavindeya xcusun rë Jesús

9.2 Xi cafë jyun nixtin jan ne, quijixin Jesús ngu rcu naxi hnga cojo cha Pedru cojo cha Jacobo cojo cha Juan. Xi cafehe me cojo cha ngajan ne, cavëë cha xi cavindeya xcusun rë me.

9.3 Tsjian rë me ne, ña seti tsejen, tsëhë xi jercu tu tyava camahani, hisca xi ngu xuta cumaji cuane me xi cuatjin tyava.

9.4 Hya xi camá ne, ha tu ñahñu camatsejen hasen rë Elías cojo hasen rë nima Moisés, tivisiajmi cojo Jesús.

9.5 Ngajan xi cachja cha Pedru cojo Jesús ta:

—Maestro, tu ma rë xi nguehe nechin cojo nuju ne, nihñi jyan puestu: ngu tsujun ne, cojo ngu ngu tsëhë Moisés cojo Elías.

9.6 Cuatjin cachja cha Pedru ta, sacuniyiin rë cha mé sa cuichja cha ta tsëhë xi jercu catsacjun camahani cha camá.

9.7 Hora vëhë ne, canduva ngu yuff casahmi tjahnguen rë. Hane ngajñi rë yuff jan ne, canuhya rë ngujo cjua xi cachja cuitjin:

—Cha vihi xi quihndi naha cha. Jercu hmucacun cha. Tinuhyun xi chja cha.

9.8 Xi tu cahndë cha ladu rë Jesús cjua vëhë ne, vutsejen nguehe vutsejen ngajan cha, hane suva sa Jesús tacun me xi cavëë cha.

12.28-31

Artículo tsëhë ley xi hitsë sa venguichji rë

12.28 Hacuaha cafehe ngu cha maestru tsëhë ley hiscan tacun Jesús. Hane xi cahndë cha cjuavisiajmi rë me ne, xi ndaja cama catsicuya Jesús, ngajan xi cavinenguise cha me cuitjin:

—Maestro, tsëhë yëjë ni cjua xi cavitexa Nina naja xcun xujun ley ne, çjarë artículo xi hitsë sa matitjun?

12.29 Ngajan xi cafayangui Jesús cuitjin:

—Xi matitjun ne, cuitjin chja: “Ngayujun ni ngayun xuta ladu rë nangui Israel, Nina naja ne, ngu tu tu ni me.

12.30 Meje rë xi nihña hmutacun Nina, me xi matitjun tsajan, cojo ngayëjë ni cjuatacun naja, cojo ngayëjë ni xahasen naja, hacuaha cojo ngayëjë ni ngahñu naja.”

12.31 Hane xi má jo ne hacui vihi: “Meje rë xi nihña hmutacun xingueen sacuatjin hmutacun suvaan yojo naja.” Tsëhë yëjë ni artículo xi cavitexa Nina ne, jo ni cjuatacun vëhë xi matitjun. —Cuatjin cachja Jesús.

14.10-11

Judas ne, viteña me Jesús

14.10 Hya xi camá ne, cha Judas tsëhë nandya Querrote, cha ladu rë Jesús tsëhë cha xi tejó jan ne, quiji cha xcun nahmi xi matitjun ne, cavëhë chihin cha cjua cojo rë me xi sahmi me entregadu cha Jesús cojo rë nahmi jan.

14.11 Hya xi cahndë nahmi xi matitjun jan cjua rë Judas ne, jercu ndama camahani rë me. Hacuaha ngutjen ni cachja me ta, sua me cha tujún. Hane ngajan xi cha Judas jan ne, cavetsihin cavangui cha chuya rë hacutjin xi cuma sahmi entregadu cha Jesús.

14.44-46

14.44 Chaja sa xi cjuehe cha Judas cojo xutacjín jan hiscan tacun Jesús ne, ha cachja cha cojo xuta jan cjua vihi:

—Cha xi cjuë cuitátсуha xi suá rë nina ne, cha vëhë xi hacui cha. Chjuhun cha, hacuaha nihñu cha, sehe tangun cojo cha. —Cuatjin cachja cha.

14.45 Xi tu cavechu cha hiscan nduva Jesús cojo cha ladu rë me xi yahnga jan ne, ngutjen quiji

casahmi tiña cha tsëhë me, hacuaha casua cha me nina cuitjin:

—Cuhndanu, Maestro. —Cuatjin cachja cha.

Cafë cachja cha cuitjin ne, sehe cavitatsuha cha Jesús.

14.46 Hya xi camá ne, quiji xuta jan ne, cafaha me Jesús.

15.6-15

Hacuiin Jesús ta Barrabás mandaya

15.6 Suhi vëhë ne, Pilatu ne, ha tuxa xcusun rë me xi nu nu ni vëhëndaya me ngu presu xi meje rë xuta xi cumandaya.

15.7 Ndavaya ne, jiya ngu presu xi hmí rë Barrabás cojo ngujo sa presu xi catsiquehen rë xuta tsëhë ngu si.

15.8 Hya xi camá ne, canduva xutacjín ne, cafehya me cojo Pilatu xi sahmi me vëhë sacuatjin xi ha xcusun rë me.

15.9 Ngajan xi cachja Pilatu cojo rë xuta jan cuitjin:

—¿Há meje nuju xi cuáxë cha xi matitjun tsujun?

15.10 Cuatjin cachja Pilatu ta tsëhë xi ha vëë me xi ngatsë rë cjuaxin sahmi nahmi xi matitjun jan cojo Jesús, vëhë xi quijicani me Jesús ngajan.

15.11 Peru nahmi xi matitjun jan ne, quiji cavinchangui me xutacjín jan xi meje rë me xi cuichja xuta jan xi catëhëndaya Pilatu Barrabás.

15.12 Ngajan xi cavinenguise nga Pilatu cojo xutacjín jan cuitjin:

—¿Mé sahme cojo cha xi nújun xi matitjun tsujun ni?

15.13 Ngajan xi xuta jan ne, cuitjin jercu cachja me:

—Tetuhun cha xcun cru.

15.14 Ngajan xi cachja Pilatu cojo rë me cuitjin:

—Peru ¿mé xi choho casahmi cha?

Peru xuta jan ne, hitsë sa rcu cachja me cuitjin:

—Tetuhun cha xcun cru.

15.15 Hya xi camá ne, ta meje rë Pilatu xi cumangucacun xuta ne, cavëhëndaya me Barrabás. Hane xi cavatju catsingatju me Jesús casehen rë ne, sehe cavuya casua nga me cojo cha sindadu xi cjue cuetaha cha me xcun cru.

15.33-39

15.33 Xi camanchisen tsëhë nixtin vëhë ne, jingujyë ni ladu vëhë ne, camajñu. Jyan hora quijicani rë.

15.34 Xi cafë jyan hora vëhë ne, jercu cajindaya Jesús, cachja me hne rë me cuitjin:

—Eloí. Eloí, ¿lama sabactani? —cjua xi meje cuichja cuitjin: Ngayun, Nina naha, ¿mé má canismutacun ná?

15.35 Hane ngujo xuta xi hinchacun jan ne, xi cavijniinrcu me hne rë Jesús ne, xi má rë xuta jan ne, nima Elías, ngu profeta tsëhë nixtin hatsëë, jindaya Jesús me.

15.36 Hane sehe cavanga ngu me quiji catsicahnchi me ngu tsjian hinda cojo xan rë uva xi ha san. Sehe cavetaha me rcu ngu ya nduju, sehe cavetaha me hntsua Jesús xi cuihingui me. Hacuaha chja me cojo xicjin me cuitjin:

—Cuinechanyan hitsë ne, ¿há cuinduva jain Elías tsitujne me Jesús tsëhë cru?

15.37 Peru Jesús ne, hora vëhë jercu cajindaya me, hane cahme me.

15.38 Hacuaha hora vëhë ni ne, tsjian nduju xi tyjanguí cahntsua yungun xi matitjun ne, hisca rcu hiscan ntsacu canduva catiyavasen.

15.39 Hya xi camá ne, ngu cha capitán tsëhë sindadu xi secun tiña cru hisca tyjanguí Jesús jan ne, xi cavëë cha hacutjin xi cahme Jesús ne, ngajan xi chja cha cuitjin:

—Cjuaquixindaja xi me vihi xi Quihndi rë Nina me.

15.42-46

Jesús ne, caseya me tsjun rë me

15.42 Nixtin xi cahme Jesús ne, hacuaha hya vispra tsëhë nixtin xi chjahájenda rë. Hane xi quiji hora jan ne,

15.43 ngu xutaxa rë xi tjemu chjahanrcun rë, xi hmí rë José tsëhë nandya Arimatea, me xi hacuaha tacunya nixtin xi cjuehe Nina cuma titjun me tsëhë yëjë Israel, cavejñahñu me cjuatacun rë me sehe quiji me ndava Pilatu. Hane cafehya me cahndë cojo Pilatu xi cjuahaxin me nima Jesús.

15.44 Hya xi camá ne, Pilatu ne, quijircun rë me xi cuatjin cachja José xi ha cahme nima ta, tsëhë xi cjëë jyë hora xi casetaha Jesús xcun cru. Hane vëhë xi catsingatju me quiji chjaha rë cha capitán. Hane sehe cavinenguise me cha sá xi quixi xi ha cahme jain Jesús.

15.45 Xi tu camachaya rë me cjua tsëhë cha capitán jan xi ha cahme jain Jesús ne, sehe ngajan xi cachja me cojo José ta cuma cjue tsitujne me nima.

15.46 Ngajan xi José ne, vëhë ta cavatsë me ngu tsjiantë xatsë ne, sehe quiji catsitujne me nima Jesús tsëhë cru, sehe cavaxtë rë me tsjian jan. Hane sehe cavaha me nima quijicojo me hiscan tacun rë me ngu tsjun xi cafahanguitaha me cahntsua ngu naxi. Hane ngajan caveya me nima. Sehe catsindefajne me ngu ndyojo jyë xi cavechja rë tingotjo tsjun jan.

16.1-7

Vuya nga Jesús cjuahñu

16.1 Xi camá nguixun tsëhë nixtin xi chjahájenda rë jan ne, na Salomé cojo na María tsëhë nandya Mágdala cojo na María naa rë cha Jacobo ne, cavatsë na rqui xi ndaja jne xi cuitejnu na nima.

16.2 Xi casahasen domingo ne, hora xi tivetjucaa tsuhi ne, cavatju na yachjin jan quiji na hiscan tacun tsjun rë nima.

16.3 Hane ngajñi cjuí na jan ne, ngajan xi chja na cojo xicjin na cuitjin:

—¿Yo cuisecoo naja xi nindefajne ndyojo xi quitaha tingotjo rë tsjun jan?

16.4 Peru xi tu cafehe na jan ne, ndyojo jyë xi quitaha tingotjo rë tsjun jan ne, ha quihndë tsajin quitaha cahndë rë ta ha xin jiña.

16.5 Xi cavisehen na cahntsua tsjun jan ne, cavëë na ngu cha xi tacun cha taha ladu quixi, yaja cha ngu tsjian tyava nduju. Hya xi camá ne, jemu catsacjun camahani na.

16.6 Ngajan xi cachja cha cojo rë na cuitjin:

—Xircuun. Ngahan ne, ha hvë xi Jesús tsëhë nandya Nasaret vinchunsun me, me xi cavetaha xuta xcun cru. Peru me vëhë ne, tsajin me nguehe ta cavuya cjuahñu rë me. Chutsujun cahndë hiscan xi cafaña xuta me.

16.7 Quihndë ne, tjangun sanii ne, tinújun cojo cha ladu rë me, cha Pedru ne cojo cha xi yahnga ta, Jesús ne, hisca tjun cuechutaha me yun ngajan distritu Galilea sacuahatjin xi ha cachja me cojo nuju.

16.15-16

16.15 Cavatju cacjan me cojo cha ne, sehe ngajan cavetsihin cachja me cojo cha cuitjin:

—Tangún jingujyë ni ngasunhdë ne, tinújun cojo yëjë ni xuta cjua rë Nina.

16.16 Yo xi cumacjain rë cjua vëhë hacuaha xtenda ne, cuechu xcun Nina. Yo xi cumacjaain rë ne, cuechu me castigu xi sahmi Nina xi cueyun.

16.19-20

Jesús ne, cjuiniji me ngahnga

16.19 Xi cajnetaha cachja Jesús, me xi Nai naja, cojo cha ladu rë me cjua vëhë ne, quiji me ngahnga,

cavéjña me ladu quixi tséhë Nina.

16.20 Hane cha ladu rë me ne, cavetju cha quiji cha, cachja cha cjua rë Nina yëjë ni ladu. Hacuaha Nai naja ne, cavisecoo me cha. Hane ngatsë rë xusun xi cavëë xuta xi casahmi cha jan ne, vëhë xi tsejen xi quixi cjua xi cachja cha.

© La Liga Bíblica, A.C. 1991